




EDITORIAL

Ora cu Constitucion y ley no ta duna claridad, norma, balornan y etica lo mester prevalece

Pa: Victor (Toko) Winklaar



E mainta cu Aruba a lanta cu e noticia cu Minister Paul Croes a keda bao di investigacion pa cosnan cu a pasa den su ministerio henter e isla a cay den shock. Con algo asina por a pasa? Dicon algo asina a pasa? Kico a pasa cu transparencia y bon gobernacion?

Dianan a pasa y porfin a sali duna cara, pero con? E ta hala atras pa Minister di Finansa Bermudez drenta aden, pero tog e ta keda cu tur derecho di firma, etc.

Mientrastanto Parlamento keto! Mas ainda e miembronan di Parlamento cu ta sostene e Gobierno, pasobra e otronan tur a habri boca y bisa con algo asina por.

Reunion a wordo pidi riba henter e asunto y despues di hopi bay bin – manera cu lo kier rek e situacion mas largo cu ta posibel pa drenta un gobernacion demisionario prome cu eleccion – porfin e reunion a tuma lugar siman pasa.

Esaki manera tur hende sa no a bay sin su rato teatral cu entrada di e comerciantenan den caya grandi.

Unabes cu e reunion a sigui riba e tema di Minister Paul Croes cu e pregunta cardinal si e por keda riba su stoel of no ta mihor p'e hala un banda completamente por a ripara cu di banda di fraccion di AVP mes tabata tin hopi confusion y aki ta caminda e cabuya ta sinta.

Den nos sistema di trias politica ta Parlamento mester wak y controla loke Gobierno ta haci, pero manera semper stempel parlament ta bolbe saca su cara mahos y ta laga cosnan sigui.

Ta ki ehempel esaki ta p'e comunidad? Acaso a vota pa Minister of pa Parlamento?

Acaso esnan escogi ta sigui loke cu partido den gobernacion kier of nan tin cu para pa loke ta corecto?

Den un entrevista cu sr. Tito Lacle di NoticiaCla.com drs. Rene (Baba) Herde di AVP mes ta bisa bon cla cu si tabata e den e posicion e lo a tuma su retiro. Pero den e mesun rosea e kier duna excusa pakico ta tratando e caso aki manera ta tratando e.

Segun sr. Herde nos Constitucion y leyman no ta atende con pa trata un caso manera esun cu a presenta unda un Minister den funcion ta wordo sospecha di a comete cierto crimen of fraude – y e tin rason.

Den e mesun rosea e ta bisa cu esaki ta cosnan cu mester wak pa cambia of adapta den nos constitucion y leyman segun e raport (WOCD).

Wel e baca mester a hoga pa awor habri riba e punto aki. A pasa cu AVP den gobernacion loke tanto nan a tira den cara di MEP pa 8 aña cu nan a sinta den oposicion y ainda despues di 8 aña di Gabinete Mike Eman I y II no a duna e tema aki ningun atencion. Sr. Herde ta habri riba e punto cu loke a pasa a laga e fraccion di AVP den Parlamento completamente den shock y cu awor tin un division grandi.

Den su mesun palabranan e ta bisa cu si e tabata den e sapato di Minister Paul Croes e lo ta tuma honor na su mes y retira y no eherce su funcion pa nada – n'e momentonan aki e Minister den cuestion a hala atras, pero ainda e tin tur e derechonan di firma y tuma decision. Esaki ta corecto?

E punto no ta si e ta inocente of culpable, pasobra esey ta keda n'e resultadonan di e investigacion y te cu awor un hende ta inocente te ora e wordo proba di lo contrario!

E ta sigui elabora bayendo bek na tempo di MEP unda cu segun palabranan di Fiscal Mayor di e tempo ey MEP tabata stroba funcionamiento di Ministerio Publico. Acaso loke ta haciendo aworaki ta mihor?

E tin rason ora e bisa cu mester tin continuidad den gobernacion, pero te na unda un fraccion cu ta sostene Gobierno por keda haci esaki?

Kico t'e mensahe cu ta mandando n'e poblacion? Acaso e pueblo votador a vota pa corrupcion. Te na unda lealtad di esnan cu ta den Parlamento – cu ta e sistema legislativo di mas halto den nos sistema di trias politica – ta bay?

Acaso nan lealtad no ta cu e pueblo?

Mas aleu Parlamentario Rene Herde ta splica cu lo mester warda riba e LandsBesluit riba e caso aki ya cu e no ta regla den nos leyman. Acaso mester warda riba algo asina pa haci lo corecto?

No tin un raport riba transparencia y bon gobernacion cu cada bes ta wordo uza na antoho? Pakico no uza esaki como e base pa tuma un decision.

Fraccion di AVP ta manera un wishi washi den henter e asunto aki cu t'e refleho di un gobernacion wishi washi n'e momentonan aki.

Si no tin un ley y si nos constitucion no ta duna claridad na unda e norma, balornan y etica di cada un di e miembronan di Parlamento cu ta sostene Gobierno a keda?

Por favor Parlamentarionan para p'esnan cu a vota p'abo ta eyman sinta no p'esnan cu ta goberna! Bo tey p'e pueblo no p'e gobernantenan.